

四庫全書

集部

欽定四庫全書

集部

毘陵集卷二

詳校官庶吉士臣翁樹培

侍讀臣孫球覆勘

謄錄監生臣汪麟

欽定四庫全書

集部四

提要

毘陵集十五卷

別集類三 宋

臣等謹案毘陵集宋張守撰守字全真一字子固常州晉陵人崇寧元年進士高宗即位召為監察御史紹興中歷官叅知政事兼權樞密院事以資政殿學士知建康府卒謚文靖事蹟具宋史本傳所著毘陵集見於陳振

孫書錄解題者為五十卷其本久已失傳故文章世不槩見僅前賢小集拾遺中載有其詩一首而已今從永樂大典各韻中蒐輯編綴約計尚存什之三四謹校訂排次釐為十五卷而以婁機等所作守謚議文二篇附之於後史稱守家貧好學過目不忘故所為文具有體幹而論列國家大事是非利害如指諸掌綽有經世之才尤非儒生泥古者所可

及史傳載其建白諸事如論防淮渡江利害  
論金人侵淮有四路宜擇帥捍禦論大臣宜  
以選將治兵為急不急之務付之六曹論幸  
蜀十害論宰相非人論敵退後措置二事今  
其文俱在集中他如論守禦事宜乞以大河  
州軍為藩鎮乞修德諸劄子為史所不載者  
尚多無不揣切時勢動合機宜其大旨在經  
營淮北以規復中原而不欲畫江自守為退

縮苟安之計洵可謂一時正論特高宗孱懦不能究其用耳至其嘗薦汪伯彥秦檜頗乏知人之明而忠藎足稱要不容以一眚掩也  
乾隆四十一年十月恭校上

總纂官

臣紀昀

臣陸錫熊

臣孫士毅

總校官

臣陸

費

墀

欽定四庫全書

毘陵集卷一

宋 張守 撰

詔

賜江南安撫大使呂頤浩詔

卿以元勲舊弼出殿大藩姦宄亂常提師薄伐冒犯鋒鏑跋履山川雖未收斬將奪旗之功亦可見推軀徇國之誼方時艱棘寒氣滋隆次舍之間節宣是慎今遣中使賜卿銀合茶藥想宜知悉

賜呂頤浩乞宮觀不允詔

省所奏乞宮觀事卿出偃外藩力扞強敵卧護諸將蔽  
遮行朝隱然長城中外倚重忽覽來奏引疾丐閒雖高  
沖退之懷殊拂倚毘之意今諸將進兵鏖擊軍聲已張  
精神折衝政有資於元老藥石自輔其務究於遠猷協  
濟多艱毋復有請所乞不允

又

省所奏乞宮祠事具悉比者李成越境南渡抗逆王師



有吞噬江左之心卿以舊弼卧護諸將扼其奔衝使諸將盡銳征討克復郡縣而賊不敢出一騎以窺饒信行朝恃以無恐者卿之功也朕方倚毗共滅此賊露章引疾殊拂朕聞朕之待卿自謂無媿至於兵將分合務濟事機非闕輕重殆不得已諒卿體國必悉朕懷卿宜少安厥次勉卒乃功以稱朕始終眷遇之意勿復有請

又

朕以卿勲舊委卿江南所賴精神折衝儀刑百辟亦非

專以吏事責卿向聞移疾求去數遣使軫手筆開諭至  
於再三朕之待卿盡矣比覽來奏猶未視事欲遂前請  
何未體朕眷委之意也以卿平日志不辭難乃貽避事  
之譏忠以事上而蹈慢令之戒朕竊為卿惜之況今寇  
攘未除防秋在邇遠近百執宜惜寸陰卿為大臣與國  
同休而必欲求去何以責將士之用命率臣庶以赴功  
朕顧江南非卿誰可卿雖力請朕志不移今遣內侍某  
撫問候卿視事訖奏卿宜深亮勿復有辭

賜呂頤浩詔

卿以元宰出殿藩州慨然帥師援九江之圍引義竭誠  
不擇劇易比覽捷報已收奇功斬馘執俘前後非一戰  
艦旗鼓獲致亦多緬想忠勞良極嘉歎輔臣奏卿出入  
行間衝冒風雨稍愆調護尤用惻然今專遣內侍撫問  
仍賜卿馬一匹并鍍金銀鞍轡一副至可領也

賜浙東制置使張俊詔

朕比委卿提重兵制置兩浙事宜本圖數日間與卿會

於明州今聞明州錢糧空乏豈能聚兵又聞敵人或由  
常州或由宣徽或由衢婺以犯越州設謀措意專在朕  
躬若失浙邦朕將焉避中夜思念寢食靡寧今已委郭  
仲荀辛企宗同力捍禦惟卿忠勇事朕累年共嘗險艱  
備著勞績昨者提兵勤王定計復辟朕非卿則倡義誰  
先卿捨朕則前功俱棄君臣之際休戚是同今則水陸  
道窮宗社危甚卿宜協謀戮力共扞北兵若能破敵保  
我越州當加王爵以酬忠蓋卿宜深悉朕不食言

又

朕自艱難以來竭國帑以養士捐好爵以勸功緩急之  
際鮮復為用或望風畏怯或臨敵奔潰朕甚悼之今者  
敵騎遽犯浙東朕方避地海隅遠邇震愍卿獨奮忠誼  
請留明州秣馬厲兵為決戰計剡章來上三軍賈勇載  
觀志畫良極歎嘉比聞敵遣偏師止數百輩涉遠勞敝  
勢宜易圖卿以精甲十倍阻險迎擊必可萬全朕有不  
次之賞以待卿下及將士次第褒擢更宜申嚴紀律毋

致侵擾官私惟卿心腹之將朕所倚毗必副眷懷寧俟  
多訓故茲示諭想宜知悉

賜兩浙制置使韓世忠詔

邇者金人南渡遽陷建康復遣偏師徑趨杭越朕以宗  
社之重暫避其鋒然念敵人勞師深入冒犯阻險殘暴  
亡厭殆天亡之時也此在會稽呂頤浩獻議欲會京口  
邀截歸路以為永圖方須卿來講究利害遽覽來奏及  
圖上方略實契朕懷惟卿忠憤之誠謀慮之審千里之

外不謀而同載觀規圖深所嘉歎倘能投機一戰取勝  
則中興宋祚惟卿之功不次之賞朕不敢靳凡獲敵所  
有資財玉帛盡予將士已令降空名告劄二百道用資  
激賞及助軍需勉踐爾言以副期待故茲告示想宜知  
悉

又

卿比統率舟師邀擊敵兵忠勇之節遠近所聞相距大  
江殆將兩月殺傷莫計俘馘良多茲提奏之屢聞嘉茂

勲之鮮儷豈謂濟師之失援致隳定亂之全功然成敗者天理之難知而勝負亦兵家之常事度尚所亡之少少豈足介懷淮陰益辦於多多尚觀來效卿其撫傷痍之衆上俘馘之功以及戰亡並當賞賚今差內侍某前去撫問如欲便赴行在即仰疾速起發前來或且駐師江陰休養士卒即令下戶部行下所屬應副錢糧故茲示諭想宜知悉

賜福建制置使辛企宗詔



朕眷七閩險遠瘠薄俗既纖嗇以趨利間多椎剽而為  
奸州縣之吏初既失於拊循盜賊之萌又復稽於彈戢  
馴致紛擾莫獲奠居朕比委卿制置一路入境問俗不  
憚險艱折馘執俘存閭勝捷士卒之氣既振姦宄之鋒  
自摧緬想忠勤良極嘉歎益翦除於黨類期綏靖於里  
閭訖其外庸竚有褒陟故茲示諭想宜知悉

賜陝西宣撫處置使張浚詔

金人去冬兩路深入南蹂洪撫以至筠袁東陷昇杭以

及明越朕以宗社至重父兄未還遠避敵鋒圖保基緒  
而我將士懷積年憤懣之志乘驕敵勞敝之師各輸厥  
忠人自為怒張俊迎戰於鄞水劉光世邀擊於江西周  
望以大軍控禦於嘉禾趙立擁義旅驅攘於淮甸捷書  
日報俘馘踵來敵人挫傷前所未有爰念既得地利之  
險以保江浙兼亦因天時之便以規河山惟卿忠翊朕  
躬勲在王室宣風邊徼備著勤勞宜屬壯猷共恢遠畧  
蓋聞敵人用兵深忌暑月要即騎卒解甲弛鞍之際稍

資秦兵投石超距之餘於五月間引兵深入一由同州  
渡渭以取蒲解一由郿延界渡河以取晉隰俯從戰勝  
百倍之氣仰符前王六月之征用我計之未嘗出敵人  
之不意竊謂一舉可圖萬全御宜審度事機益深籌慮  
勉卒賢業無規近功庶幾盡復兩河迎還二聖以底中  
興之烈豈不偉歟

又

朕以疆場多虞風塵未靜東巡江左倏已逾年西顧秦

中邈焉萬里念王靈之阻濶將使指以宣風卿位冠樞  
衡勲昭社稷挺忠精之特操早被簡知秉經濟之遠猷  
靡辭煩劇曩疇咨而臨遣獨慷慨以請行載涉炎涼脩  
宣忠力蒐卒補乘既大振於軍聲摘伏發奸復少蘓於  
民瘼每閱封章之上具形憂國之誠爰遣使軺往宣德  
意載念高秋在候殘敵未還恐尚肆於貪謀盖有資於  
外援宜提勁旅預控上流諒惟心德之同必體國家之  
急朕所倚重寧煩訓辭故茲親筆示諭想宜知悉

又

卿宣威關陝備著忠勞遣將出師屢聞勝捷昨得七月  
奏已復廊延一路及京兆府等載觀規畫良極歎嘉仍  
期八月進兵圖取蒲解自是以後音驛不聞夙夜惟念  
頗深西顧之憂蓋聞金人會兵進銳以窺陝右深恐萬  
一或墮敵計更宜珍重以收全功今朕留會稽沿江扞  
禦頗嚴淮甸敵人不取南渡但江南諸盜未靜已遣張  
俊同池帥呂頤浩悉力翦除皆不足慮計卿欲知因令

密院遣人問卿動息軍事曲折可悉以聞

又

斬趙哲  
待罪

比聞金人糾合重兵力圖關陝惟卿倚重寬我顧憂雖  
提五路之全師乃當百戰之勅敵非賞罰信號令明不  
撓不疑鮮克有濟爾來縱敵玩兵驕惰成風卿能明節  
制之權正追撓之律罰一勸百孰謂不然引咎露章益  
見忠謹況乃一勝一負兵家之常所亡不多無足介意  
更圖後舉以收全功其堅乃心益務持重庶幾盡復境

土以成中興之烈朕之所望也所待罪放想宜知悉

又

朕眷關中天下根本卿將使指為朕遠行載涉歲華具  
宣忠力自得去年九月所上章尋降親筆放罪去訖比  
覽呂頤浩奏謂卿失利之後退保興州欲取間道至熙  
河點兵以圖再舉朕復聞此宵旰增憂重以山川阻修  
道路榛梗音驛不至已踰半年機事之間難於踰度復  
念自古成敗不可必期卿宜審量事機擇利而處敵人

既悉重兵以窺秦蜀而我師挫傷之餘或未能長驅而  
深入也第宜謹守關塞益務持重儻或牽制強敵不能  
南侵則亦惟卿之功當忍小忿徐為後圖近者李成跳  
梁剽殘江南數州已委呂頤浩張俊犄角進兵大獲勝  
捷想此逆賊不日勦除而淮甸殘敵亦稍引去諒卿聞  
之當亦少寬憂國之意人回宜悉具彼中事宜曲折一  
一聞奏

又



比得卿三月四日奏待罪及乞選委重臣鎮撫關陝事  
具悉卿宣風陝服久著忠勤失地喪師頗增憂顧夫敵  
以乘勝不可當之鋒我以新集不素練之卒衆寡堅脆  
固不可侔欲一戰以收功豈萬全之可必天未悔旤既  
往莫追然敵人既得志於三秦必垂涎於全蜀而又南  
牧之兵尚頓淮揚則吞噬江左之心猶未已也卿宜收  
合殘散養銳待時但能據險堅壁謹守要害既以保固  
四川之地又能牽制南下之師則亦惟卿之功兵忿者

亡古人所戒毋疾戰以規近利毋深入以蹈覆車益遠  
乃猷毋忽朕命相去萬里音驛罕通次舍之間更宜尚  
慎所待罪放免

浙西親征詔

朕念中原之微弱憤強敵之憑陵固嘗屈己以請和尙  
復阻兵而肆虐叱由海徼還次越邦赤子流離殆失耕  
桑之候聚廬焚蕩盡為瓦礫之場咎在朕躬旣貽爾衆  
幸民心之未替知天命之攸歸然而殘敵尙假息於江

頃潰卒復肆行於近境坐念傷痛詎容懷安是思晉文  
桑下之謀遠跡漢高馬上之略斥嬪御膳羞之奉躬鞍  
馬甲冑之勞董率六師巡行列部既欲撫綏於彫瘵又  
將彈戢於姦偷庶幾消弭禍災圖回基緒尚賴朝廷將  
士州縣吏民戮力奉公忘家徇國各務殫於忠赤用宏  
濟於艱難朕以四月某日巡幸浙西所有六官百司並  
留越州

賜門下詔

朕顧德弗類遭時多虞臨民馭朽索之危涉道濟巨川之遠向者敵師深入國步載艱永惟責躬避位之圖專為講好息兵之計力祈大國冀迎二聖以遄歸庶保丕基可致四方之綏靜今則奉太母之慈訓念嗣君之幼冲致兵民推戴之誠諭內外請祈之切謂防秋在邇當愛日以有為謂遣使出疆恐尋盟而未遂露章狎至復辟為期朕以太后之旨不敢違羣下之情不可却遜辭靡獲任重難堪仰太母之慈仁許同聽斷肆眇躬之寡昧

敢憚憂勤朕以東朝有垂簾保祐之勞元子有踐祚纂  
承之託上徽稱於長樂以致四海之驩正冢嗣於青宮  
以系萬民之望式頒溫詔誕告多方嗚呼有臣三千實  
倚同心之助卜年七百復開過歷之期更資中外之交  
修庶格天神之協佑咨爾有衆咸體至懷太后宜上尊  
號曰隆祐皇太后令有司擇日奏請嗣君宜立為皇太  
子令有司擇日備禮冊命施行所有三月六日赦文應  
干恩賞等事有司疾速施行如有稽遲重寘典刑故茲

詔示想宜知悉

又

朕遭時艱危兩宮北狩實賴隆祐皇太后母儀天下保佑朕躬菲德寡祐奄臻禍變伏讀遺誥貶降禮儀固宜仰遵慈仁之訓爰念太上皇帝繼統於哲宗靖康垂簾授位於沖眇中更苗劉之變尤高社稷之功雖正隆名未極大養非盡尊崇之典曷昭仰報之誠隆祐皇太后應干典禮可比擬欽聖憲肅皇后故事令有司討論詳

定以聞朕以繼體之重當從重服以稱孝思之意故茲  
詔示想宜知悉

又

朕惟隆祐皇太后坤儀如昨殯奉有期永懷夫保佑之  
功務極其哀榮之典爰念蒙垢於紹聖之末即瑤華而  
退居復位於上皇之初實欽聖之慈旨值姦諛之當制  
乃隱沒而不言未洗謗傷久淹歲月肆朕纂紹逢時艱  
難雖正隆名未伸褒冊將即廟庭而登配豈容典禮之

久稽用詔攸司載加追責可令禮部太常寺討論合行典禮及奏告天地宗廟等事申尚書省

太后賜門下詔

勅門下以公滅私者哲王之明訓右賢左戚者治世之遠圖吾以寡昧之資際艱難之運永惟付託之重寧辭保祐之勞聽政垂簾非眇躬之得已撫時多壘豈故事之敢遵已裁御府之膳羞仍損家庭之恩數靡敢伸於私諱恐涉僭踰復申勅於本宗以防干撓乃掌兵於內外



或充職於朝廷事屬嫌疑理宜避免克自抑畏期感格於天心始於憂勤庶緝熙於治道咨爾有衆咸體至懷除膳羞已裁減外其因垂簾應干恩數痛行減省故事當諱父名亦更不避以稱吾恭已抑畏之意本宗子弟已降詔旨不任要職不於私第見宰執不干于朝政可令今後不得任內外掌兵官及在京并行闕職事官忠厚見提舉巡幸一行事務亦罷故茲詔示想宜知悉

賜中書侍郎王孝迪尚書左丞盧益赴闕詔

勅孝廸朕遭時艱危宵旰求治寔賴左右前後協恭戮力以圖康功卿譽望才猷簡於朕志圖任共政時惟舊人召還廟堂允資經濟固宜朝聞命夕引道也倚注茲久未聞造朝其悉大臣體國之誠無徇匹夫小廉之節亟祇新命以副虛懷已除卿中書侍郎詔書到日卿星夜起發前來赴行闕不得更有辭免故茲詔示想宜知悉春暄卿比平安好遣書指不多及

賜浙西安撫大使劉光世詔

承州殘敵攻圍山陽諸鎮之師逗撓不進以卿任兼將  
相勲望特隆已即指揮並聽節制比見探報王師若柵  
皆在高郵之南去楚尚遠勢不相及深慮淹久致失事  
機唇亡之憂于卿為重宜速渡大江以身督戰庶使諸  
鎮用命戮力盡忠亟解山陽之圍一掃垂盡之敵朕亦  
議遣大軍以為卿援諒卿體國必悉朕懷

賜張浚特進學士院詔

浚躬率將士列屯兩淮以至經理上流皆中機會邇者

強敵擁衆深入蹂踐淮西浚親臨大江以身督戰將士  
賈勇一勦無遺而襄漢之間捷書屢上勲勞顯著深用  
歎嘉宜有褒陞以勸列位

賜江南西路安撫大使朱勝非詔

朕比裂江北之地分置鎮撫以扞外敵眷惟江南密邇  
行在復擇勲望之臣建三大帥所賴心德惟一精神折  
衝稽之公言蔽自朕志卿惟舊弼朕所眷知九江上流  
倚卿為重意其朝聞命夕引道也抗章遜避殊拂朕懷

朕以艱難累歲夙夜究圖小大之臣所宜戮力呂頤浩  
劉光世皆以復辟之勲當一面之重授任而往罔敢憚  
行庶幾公忠表倡列位卿其體國勿復固辭除已令學  
士院降詔并遣使撫問外故茲親筆宜悉朕懷

又

朕建三大帥控臨兩淮率用勲德大臣以隆方面之寄  
卿惟故相朕所眷知畀卿九江選任寔重除命之下已  
淹歲時猶未奉詔之藩塞帷視事彈章累上謂朕失刑

命令倘或廢於大臣法度豈復申於百執朕亦恐道途  
尚梗或致愆期而典憲遽加有傷體貌益思全度務極  
始終卿宜念九江收復之初百姓彫敝之極即日引道  
往見吏民撫摩瘡痍招輯流冗不獨逌逌御逌慢之責亦  
得以副朕勤卹之心毋復稽留重招物議故茲詔示其  
體至懷

賜威武大將軍曲端詔

朕遭時多艱移蹕暫避眷關中阻山帶河之勢為天下

勁兵健馬之區扞我邊虞倚時將畧邈在遐外惕然顧  
懷曩臨遣于樞臣俾昭宣于德意惟卿姿稟沈毅世篤  
忠勲久提貔虎之師式著疆場之略比覽行臺之近奏  
益知分閫之賢勞已建殊名俾護諸將旁兼制於五路  
外折衝於二邊用彰推轂之誠復峻廉車之秩寵嘉特  
異眷倚可知庶圖展盡於猷為豈復致疑於讒間朕念  
隆上都而觀萬國孰踰關陝之雄得猛士以守四方遠  
相韓彭之烈其體朕志無愧前修

賜孔彥舟詔

汝頃事朕藩邸具知忠勤從軍累年頗著勞績比聞提兵遽入湖南公肆侵擾遠近驚疑以謂汝有攀附之恩亦復如此為天下笑朕為汝惜之諒因軍兵闕糧非汝本意昨已除汝正任觀察使湖南副總管想已祇受今聞李成遣馬進攻圍江州江南大擾呂頤浩已統萬人問罪朕以行在防秋未欲繼發大兵汝可統率部曲解圍江州併力以討馬進候勦除淨盡入覲行在不特以



功贖過朕當以節度使授卿勉立大功務全終始故茲親筆宜悉朕懷

賜浙東宣撫副使郭仲荀詔

朕以金人渡江移幸傍郡委卿宣撫浙部統率將士以  
扞強敵始欲俟朕駐蹕明州期卿等來今會到錢穀數  
極微少深憂乏絕以饑我師而又探聞敵師已圍建康  
分兵由常或宣徽或衢婺以窺會稽則區區之意專在  
朕躬又思敵人雖強勞師遠襲已非所利而況吳越阻

山帶江地皆沮洳道徑隘狹得地之利于茲為多若以逸待勞以少擊衆資卿忠智誠非所難又思國家艱難以來裁損百費竭力養兵若俟緩急以保衛為名不復接戰已非本意而又君臣聚首竄身海隅縱獲生存豈不有愧朕中夜思念寢食靡遑今卿與張俊辛企宗有甲兵二萬并李鄴所聚民兵亦約萬人西阻濤江南依山險以此衆戰誰能禦之卿宜審思以身督戰大將以下有不用命當以軍法從事俟卿戰退大敵功狀來上

即除御同知樞密院事故茲親筆卿宜知悉

賜嚴州柳約詔

金人入寇遽犯臨安復遣偏師遠及明越朕方避地遵海而南將士情驕鮮復用命卿守偏邦慨然請行欲與諸郡合從尅復吳會比覽來文良用嘉歎今張俊在明州已聞捷報韓世忠全軍在樵李杜充在儀真各圖邀擊已令周望遣陳思恭統兵前去收復臨安卿更審量事宜統率將士土豪以決進討如不可躬行即選將官

前去候立功績當不次褒擢其餘將士土豪等第推恩  
故茲親筆想宜知悉

賜新除端明殿學士同簽書樞密院事鄭穀辭

免恩命不允詔

勅鄭穀省所奏辭免恩命事具悉朕纂承丕緒蒙訓東  
朝國步多艱允賴股肱之力邊郵制勝尤先帷幄之籌  
博選人豪俾參兵柄卿純心許國厚德鎮時諫垣多補  
過之規憲府著推剛之節直而不撓屹砥柱於中流行

其所知灼元龜之先見已信顧言之行兼圖濟武之文  
宜密贊於樞機亟延登於廊廟允符公望何事撓謙往即  
官常毋替朕命所請宜不允故茲詔示想宜知悉

賜新除端明殿學士同簽書樞密院事李邴辭  
免恩命不允詔

勅李邴省所奏辭免恩命事具悉朕以寡昧屬茲艱虞  
內侮外陵國有阽危之勢將驕卒惰人無賈勇之心顧  
經世之鴻才付本兵之重寄卿器姿閎達問學淵深

然華國之文籍甚映時之望復登鰲禁小心蓋得於鄭  
網肆演綸言大手每煩於德裕已賴揮毫之助更資借  
筭之謀入贊鴻樞實諧清議曷過形於奏牘欲懇避於  
恩章往即欽承體茲眷待所請宜不允故茲詔示想宜  
知悉

賜新除戶部尚書孫覲辭免恩命不允詔

勅孫覲省所奏劄子辭免戶部尚書恩命事具悉文學  
政事皆為兩科文學之士患於虛浮而無實用政事之

才患於固陋而無遠謀求其兼全付以劇任卿以文學則博古通今而有可用之實以政事則練達利害而有經遠之謀惟時地官實總國用制多寡之數以節其出入幹盈虛之權以通其有無卿蓋優為何足遜避惟長與貳事任畧同循次而遷公議僉移亟祗成命務體眷懷所請宜不允故茲詔示想宜知悉

賜新除翰林院學士李邴辭免恩命不允詔

勅李邴省所奏辭免恩命具悉朕惟纘承大統雖有事

於戎昭鼓動多方亦莫先於文告簡求雋老寓直禁林  
卿學探本原文參經緯發揮七制曩聞黃絹之詞流落  
兩朝宜復青氈之舊仍竚論思之益豈專潤色之工成  
命既頒公言胥穆寧煩沖挹亟體眷懷所請宜不允故  
茲詔示想宜知悉

賜右諫議大夫鄭穀乞待罪不允詔

勅鄭穀省所奏乞待罪事具悉比以強敵歲侵中原日  
削奄入淮甸駐蹕吳中引咎責躬以弭禍變卿以忠義



之節蹇諤之言宏益居多庸臣沮傷不悉聽用肆予寡昧方賴箴規屏居固辭非朕之志往安厥次益罄乃忠所辭宜不允故茲詔示想宜知悉

賜新除御史中丞鄭穀辭免恩命不允詔

勅鄭穀省所奏辭免恩命事具悉朕聞良藥有苦口之利明鑑無見疵之尤惟求讜言有補治道方佇告猷之益式圖已試之功卿遠識造微純誠許國踐揚諫省箴規久著於青蒲擢長臺端彈擊佇觀於白簡宜亟殫於

忠赤以宏濟於艱虞何執撝謙尚形遜避往祗成命益體眷懷所請宜不允故茲詔示想宜知悉

賜新除中書侍郎王孝迪辭免恩命不允詔

勅孝迪省所奏辭免恩命事具悉天下有緩急之勢君子有行藏之時上既求賢而圖濟於艱虞下思行道以自期於著見則君臣相得而治功可成卿望臨一時身兼數器顧予眇質允賴於交修惟爾舊人廼先於圖任況茲國勢未振政本久虛何弗體於眷懷尚曲形於謙

挹亟踐厥次無復有辭所請宜不允故茲詔示想宜知  
悉春暄卿比平安好遣書指不多及

賜新除徽猷閣待制康允之辭免恩命不允詔  
勅允之省所奏劄子辭免恩命事具悉朕省方觀民錄  
德定位式示臣工之勸豈容名器之私卿識慮精明風  
力強敏壽春假守而羣偷辟易隱若長城之賢武林開  
藩而千室晏安熏然慈父之政肆加詢考備見忠勞可  
無勸賞之公以慰借留之願賜金增秩頒漢室之璽書

簪筆持荷綴甘泉之法從增華使節允協師言何必撓謙尚仍固避往祇成命亟體至懷所請宜不允故茲詔示想宜知悉

賜資政殿學士葉夢得辭免知洪州恩命不允

詔

勅夢得省所奏劄子辭免知洪州恩命事具悉朕惟才能之士可與有為而或失之輕道德之士可與有守而或失之緩乃選於衆兼用所長卿學問深博而道德足

以鎮浮識慮精明而才能足以辦劇眷南昌之都會寔  
行闕之藩維輟吾重臣殿此南服惟鎮浮而不擾乃能  
綏靖兵民惟辦劇而不勞乃能鎮服姦暴允穆清議寧  
煩固辭式適其行無替朕命所請宜不允故茲詔示想  
宜知悉

賜淮南諸鎮詔

朕秉德弗類遭時多虞敵騎憑陵貪殘滋甚乘輿播越  
艱險脩嘗永懷祖宗積德之勤遠念父兄刼遷之難下

憫黎元之荼毒近傷井邑之陵夷跼地蹐心痛心疾首  
比旋師於江浙尚牧馬於淮堧靜言淹久之因復有窺  
伺之意爰念肇分列鎮實控敵巢奮忠誼以致身必思  
賈勇顧敵人之在境諒已疚心矧盛夏之抗陽屬羣雄  
之解甲弓弩弛緩鞍馬疲羸事亦易圖機不容失宜倡  
齊公九合之義共成宣王六月之征擊其情歸庶有符  
於往志貴乎拙速當毋失於天時懋建非常之勲即膺  
不次之賞候詔書到日可會合諸鎮同共勦除淮甸金

人餘黨以成大功故茲親筆示諭想宜知悉

賜御營都統制辛企宗詔

朕比委卿於會稽固非得已始圖駐蹕馳驛召卿今聞敵師之東專於窺朕四明空乏無以聚兵朕之精兵皆會吳越若不依地利之險阻作士氣以驅攘則君臣竄身去將焉避中夜思念圖濟艱危已詔仲荀俊戮力協謀以扞遠敵况聞分兵而來其徒必不衆多惟卿宗族被遇累朝卿之忠嘉朕所體悉告辭之際屢布悃誠諒

不以入衛為心則天下非朕所有卿宜體國家之急忘位貌之殊賈勇爭先無致嫌隙賞罰之柄朕不敢私儻有成功即頒旄鉞示茲親筆朕不食言

明州奏捷賜詔

朕觀國家自金人入寇以來士氣沮喪莫敢撓其鋒者今復遣輕兵深入四明卿賈勇先登以身督戰大獲勝捷忠誼之節俘馘之功獨高一時載覽封章良極嘉歎已令張公裕具海船二百隻前去以俟凱還更宜勉勵



以全大功毋使匹馬生還是所望於卿者懋功之賞朕  
不敢私故茲親筆獎諭想宜知悉

[illegible]

欽定四庫全書

毘陵集卷二

宋 張守 撰

制

葉適寶謨閣待制知建康府兼沿江制置使制  
朕緬懷函夏式重陪京維昔秣陵有孫仲謀劉元德之  
論在於今江左與漢河內唐東都之地均惟時保釐必  
在俊傑具官葉某天才英邁神慮安閒學廣問多務輯  
先民之緒任重道遠不蘄近俗之名嘉挹注之不盈趣

延登而入侍而志計懇到裨益宏多嗟議論之折衷實  
獻納之攸賴朕惟藜藿之不採莫強樽俎之折衝方圖  
制勝之自中重惜爾身之在外然念石頭之形勢實為  
江左之重輕爰陞次對之班允副居留之望噫覽神州  
之風景勿謂無人撫地險之山川亦足用武其往敷於  
聲教以思啟於封疆

劉光世除太尉淮南制置使制

門下履至尊而制六合莫先禦侮之圖賞有功而勸百

僚敢後酬庸之典顧予寡昧撫時艱虞眷右武之辰思  
復隆平之業矧本兵之寄尤資英傑之才咸造于庭明  
聽朕計具官某識慮精敏性資沈雄久宣衛社之忠茂  
著干城之略稟山西之勁氣事不辭難運堂上之奇兵  
算無遺策蚤頒將鉞祗扈殿巖外總制於元戎內視儀  
於公保威名播於夷夏嘉績藹於旂常爰念敵騎北侵  
鑾輿南渡衆披靡而引避獨慷慨而請行扞蔽江流屹  
若長城之固折衝淮甸隱然敵國之威繫控扼之殊勞

曾褒崇之未稱是用酌詔功之上賞進掌武之崇資位  
蓋久虛器非輕授若古命數有加印綬之榮視今官儀  
實亞台衡之俊增衍爰田之賦併加真食之封下僉穆  
於師言外增華於帥閫於戲有常德而立武事朕方依  
爾猷為無寵利以居成功卿何勞於戒訓尚恢遠略嗣  
有寵章

葉夢得除尚書左丞制

勅朕惟天下之事總於文昌網維政幾實賴丞轄日者

敵騎北乘匹馬南渡政事衡決圖籍散亡朕欲經理庶  
務捨其舊而新是圖非得者明博通之士而謀之鮮克  
有濟具官某精微之學兼明乎古今強敏之材不擇乎  
劇易兩直鑒禁蔚為詞宗再領版曹實藉心計論思獻  
納宏益居多朕方深共政之圖宜正頻虛之位攄發底  
蘊革弊扶衰以助朕有為是所望於爾也其體眷懷無  
廢朕命

盧益除尚書左丞制

朕以眇眇之身奉丕丕之緒雖臨御聽斷仰法祖宗而謀謨贊襄實賴丞弼眷求舊德協圖康功具官某德度粹夷英姿亮達經濟之才足以決巨細之務淹該之學足以通古今之宜中外踐揚望實休顯昨登右府參幹樞衡嘗共濟於艱難未少攄於素蘊遽辭機政殊弗師言念強敵之憑陵想舊人之風采載惟二轄實總萬幾有嘉難進之風申畀頻虛之位尚期展畧以副虛懷

張澂除尚書右丞制



朕聞古人有云未至而言固常為虛及其已至又無所  
及此人之所以難言言所以難聽而上下蔽塞禍亂相  
尋人主往往悔悟而不能救朕遭時多艱匹馬南渡登  
用賢俊庶幾改圖具官某學造古人之全才周當世之  
用赤心事上有孜孜奉國之公正色立朝有蹇蹇匪躬  
之節曩由詞掖擢長憲臺進藥石之良規發著龜之先  
見南渡之事卿嘗預言庸臣蒙蔽以及於難中夜悼念  
流涕何追今方易柱改絃鼎新百度揆之清議蔽於朕

心進轄文昌參決大政朕蓋有愧於初而圖功於後也  
益罄遠猷以濟大業朕意所屬爾其欽哉

翟汝文資政殿大學士薛昂除尚書左丞制

立后王君公之職維以乂民須股肱心膂之臣共為同  
體不有君子孰成厥功眷我舊人乃心王室俾復預政  
罔有間言具官某為老成人以儒術用柔亦不如秉大  
雅之明和而不流蹈中庸之德乃者釋位承轄宣勞輔  
藩思聞嘉猷復畀舊物用臯陶不仁者遠國其庶幾聞

樂正好善則優人有所恃爾其謹守國是克協典常使  
六官羣卿並序厥位四方庶俗永底於成爾亦休哉

季陵除中書舍人制

朕惟艱難之時雖從事軍旅以圖恢復然亦必有威責  
之令文告之詞風動四方使之退聽言之不文行之不  
遠具官某學博而貫於古才敏而宜於今文詞之工士  
論推美郎曹宰屬游更劇煩奉常螭坳載厯華近茲疇  
人望俾代予言庶幾播告之修不匿厥指撫循疲民而

父老惜湏臾之死鼓舞流俗而武夫懷感激之心則於當今乃為稱職

范宗尹除中書舍人制

朕觀三代而上訓誥誓命載為六經後世老師宿儒白首不能究至唐奉天詔書雖一時武夫悍卒至於揮涕感激何三代之言難明而奉天之詔易諭也蓋三代之言醇質簡古貽萬世之訓奉天之詔哀痛深切濟一時之危精粗淺深固不相準其有補於世亦豈異也朕博

求譽髦寘之詞掖具官某學該綜而能文氣剛方而有  
守發宣和之冊具聞謇諤之言立靖康之朝尤著論思  
之益茲久淹於湖海諒彌富於經綸乃復賜環俾從掌  
制蓋將求藥言於季輔問古事於仲舒不特取詞命之  
有補於世而已也尚勉之哉

葉夢得除知洪州制

朕惟大江之西為支郡十悉統於豫章郡蓋據九江上  
流凡由荆襄順流而下有建瓴之勢顧朕時巡建康嚴

飭備禦而豫章之地實為襟喉簡求時髦作我藩翰具  
官其稽古之學足以濟時應變之才足以撥劇登廊廟  
而贊經綸之業制國用而幹盈虛之權無施不宜有言  
底績輟從邇列殿此大邦使隱然長城有以折衝制勝  
於無形實朕所以用爾之意也祇服朕命往其懋哉

賈安宅落致仕除吏部侍郎制

天下無事則獵纓整襟以進取而有餘天下有事則褰  
裳濡足以馳救而不足君子之行藏進退適於義而已

矣厥今海內繹騷國勢卑弱羣聚天下之英雋而共圖之蓋褰裳濡足之時也具官某才周而用博學富而詞工奉對廣廷文冠多士陞華從橐望臨一時顧當強仕之年而有乞身之請雖揮金娛老有慕於古人念仄席求賢盡存於王室況天官高選銓敍羣才僉曰汝諧勉為朕起其體眷待務罄論思

中書舍人黃唐傳林適除待制宮祠制

朕以冲眇屬茲艱危加惠臣工使之均勞逸而全進退

不吝名器所以興豪傑而圖治功矧予邇聯以疾來諗  
式頒寵渥庸示眷私具官某學術粹醇操履端潔掌綸  
言於西掖方竚於論思扈鑾馭以南巡偶愆於衛養重  
違勤請俾即便安爰陞次對之華乃畀真祠之逸顧朕  
宵衣旰食於上羣臣纓冠濡足之時諒雅意於朝廷當  
不忘於猷畋往服朕命思罄乃忠

張浚除禮部尚書制

六經之道同歸而禮樂之用為急記禮者必曰軍旅有



禮故武功成用兵者必曰少長有禮而師可用則禮豈  
端為治世設哉朕遭時多艱方以馬上治天下而不敢  
忘俎豆意出如此具官某高明而重厚剛毅而裕和博  
敏之學足以濟時清修之節足以勵世論事則嬰鱗而  
不患治劇則游刃而有餘曩由臺端擢貳宗伯因時綿  
蕝咸適所宜以至贊軍畫以居中總戎旗而殿後智勇  
之畧尤簡朕心長茲春官亶穆羣聽然豈特用爾以禮  
文之事而已哉論思獻納以助朕有為蓋所望於爾也

往祗厥官無替朕命

孫覲除戶部尚書制

朕獲承至尊適際艱運郡邑殘破而賦入滋削邊鄙俶  
擾而費出無窮將因陋就寡而不為遠圖則有國不足  
之憂將仰取俯拾而不遺餘力則有民不堪之患欲付  
是任實難其人具官某學問醇深言奇而適於用智慮  
英敏遭變而知其權才無不宜用然後見當乘輿一旦  
南渡之後而行闕百須並起之時幹旋盈虛指顧辦給

效見已試亟陞八座之崇國恃以彊佇富九年之積周  
冢宰制國用蓋垂量入為出之規唐宰相兼度支乃貽  
剝下媚上之誚其體慈儉之意益圖均節之方爾所優  
為寧俟多訓

觀文殿學士中太一官使兼侍讀除應道軍節  
度上清寶籙宮使制

門下參華秘殿久陪清禁之嚴錫命齋壇就易真祠之  
逸豈名器之可假實文武之無資允穆師言誕揚渙號

具官某器博而用遠實茂而聲宏碩學貫乎九流敏識  
通乎萬務資以忠藎知無不為安於行藏綽有餘裕夙  
懋踐揚之績浸階華近之途頃參秉於政機賴翊襄於  
帝載式是百辟揉此萬邦俯從均逸之求益閔宣勞之  
舊肆加顯職雍容琳館之游仍侍中宸紉繹金華之業  
閱日滋久告猷益嘉是用載疇顯庸申錫徽號眷東吳之  
輿壤肇建節旄繫上清之殊庭實歲金簡豈獨侯藩之  
倚重亦惟道化之由興併獎者明庸勸羣下於戲專節

制於外朕方隆禮貌之誠侍燕閒於中爾尚罄論思之美顧惟舊德寧俟訓辭

鄭穀除中丞制

晉叔向曰大臣重祿而不諫小臣畏罪而不言此患之大者肆予寡昧奉列聖丕基重罹多艱大啓言路思得直諫之士付耳目之寄肆加詢考實難其人具官某以剛毅敢言之姿懷精忠向上之志踐歷諫省規益居多深明治亂之機力辦忠賢之實已試之效著乎朝僉執法

於中蔽自朕志爾其展盡底蘊入告嘉猷朕虛心委已  
以聽焉必體至懷寧俟多訓

表

代皇子賀冬表十道

載臨天統物迎六氣之元參亞歲儀廷備八能之奏中  
賀恭惟尊號皇帝陛下道侔天大福與陽昇茂膺滋至  
之休永御舒長之日臣職依紫禁倍霑雨露之私時正  
黃宮願上岡陵之祝

天統為元厯重三正之首雲官告瑞臺先五物之占中  
賀恭惟皇帝陛下盛德懋昭神功不宰福與陽而浸長  
明並日以常昇臣位忝後星拱密依於北極禮逢亞歲  
壽竊擬於南山

氣至以和合八能而備奏陽舒而復推五福以類昇中  
賀恭惟皇帝陛下以天為宗對時育物運陶鈞之獨化  
嗣厯服以無疆臣托跡宸闡望天顏而密邇迎陽候管  
識君道之方昌

氣鍾於子潛通嶰谷之和天統為元允協周時之正中  
賀恭惟皇帝陛下德進十日序合四時丁復旦之初陽  
茂履長之景福臣趨庭佩訓欣觀亞歲之儀舞手稱觴  
敢上後天之算

占五物於魯臺休祥紹至合八能於漢殿協氣昭宣中  
賀恭惟皇帝陛下端命穆清宅心昭曠於四時而序合  
宜五福之類昇臣身托璿源覲嘉時之有淑慶符神策  
知景祚之無疆



氣鍾於下知萬寶之潛萌道兼於天與一陽而來復中  
賀恭惟皇帝陛下神心經緯休德昭清祥開御辨之辰  
寵受履長之慶臣謬依宸極獲邇天顏實彈善頌之誠  
彌永無疆之厯

寶厯延鴻啟迎陽之協氣昕朝告慶歲亞歲之盛儀中  
賀恭惟皇帝陛下德與時亨道侔天運膺萬年之景貺  
滋庶類以潛萌臣身托璿源仰玷寵光之厚時調玉燭  
第彈鼓舞之誠

解律布和時重三正之首魯臺觀象祥先五物之占中  
賀恭惟皇帝陛下剛健乾行文明賁飾體四時之不忒  
膺萬壽之無疆臣欣遣嘉辰居慙弱植慶但深於螽躍  
歡敢後於嵩呼

星連月合載臨天統之元陽長陰消允協雲官之瑞中  
賀恭惟皇帝陛下神躬萬變道體二儀滋生育之初陽  
廓舒長之化日臣仙源毓質既欣千載之逢帝所稱觴  
敢後萬年之祝

主躔舒景臺先五物之占律本導和樂備八能之奏中  
賀恭惟皇帝陛下功侔乾覆德與陽亨坐臻有永之年  
以御無為之化臣分輝霄極身獲邇於威顏稱慶宸庭  
心實勤於禱頌

代皇子賀正表十道

考天度於珠躔斗回寅次驗人時於玉燭氣襲東郊中  
賀恭惟皇帝陛下欽奉三無惠綏九有運陶鈞之獨化  
體厯數以在躬暖然似春氣和臻萬物之應就之如日

陽明知五德之升臣夙侍慈闈親逢穀旦第慙弱植阻陪鴛鴦之班敢罄丹誠共上岡陵之祝

受圖籍於三朝禮行獻歲執玉帛者萬國共慶北辰中賀恭惟皇帝陛下湯聖日躋堯功天大撫辰以凝庶績受福以浸黎元曰暘而暘行四時而不忒出甲於甲育萬物以皆昌臣謬忝藩封恪循子職鴛鴦行并舞未陪東閣之班雲幄靚深徒切北辰之拱

漢受圖籍於四海會以三朝周垂治象於萬民斂以挾

日中賀恭惟皇帝陛下躬禹勤儉體湯寬仁誠克奉於  
三無時屢臻於大有得天之紀坐守不宰之功維春之  
祺永受無疆之福臣齒方穉身托蓋容淑景宴溫竊  
慶逢辰之幸天顏悅豫益深就日之忱

端月始和垂周官之治象發春東作授堯厯之人時中  
賀恭惟皇帝陛下道冒無方化孚有截天地位而萬物  
育日月照而四時行迎穀旦之光華後天不老納蒼生  
於仁壽與物為春臣猥以穉蒙獲逢熙盛受圖籍於四

海竊預觀瞻膺壽考之萬年第形祝頌

厯本夏正定四時而成歲禮隆漢會旅萬國以受圖中  
賀恭惟皇帝陛下舜治巍巍周文郁郁德應期於木盛  
歲預卜於金穰維春之祺已仰膺於眷顧向明而治斯  
永御於升平臣顧以弱齡親逢獻歲慈闈曳綵阻陪東  
閣之班秘殿稱觴敢罄南山之祝

漢殿受圖丕講三朝之會周邦布象肇新挾日之觀中  
賀恭惟皇帝陛下乾德資生離明繼照際天所覆逢熙

旦之光華與物為春播至和於動植臣蚤依霄極欣履  
歲端謬分茅土之榮敢後岡陵之祝

夏時協正物資引達之和漢會受圖朝旅貢珍之盛中  
賀恭惟皇帝陛下配德天地玩心神明撫于五辰致四  
時之不忒申以百福綿萬壽於無疆臣謬忝天支尤荷  
照臨之德欣同星弁共殫呼舞之誠

魯史以正次王式謹履端之序夏時以人為統蓋先引  
達之功中賀恭惟皇帝陛下一德享心四時合序配天

其澤既丕冒以無私維春之祺復垂庥於罔極臣居慙  
弱植獲際休辰欣鳳歷之載新邁駕行而竊抃

旅圖籍於漢京肆歲雲龍之會垂治教於象魏一新邦  
國之觀中賀恭惟皇帝陛下治格太寧功深不宰包涵  
徧覆繫妙化之範圍引達孳萌由至神之鼓舞臣仙源  
毓質欣逢四序之新帝所承顏願上萬年之祝

堯歷更端定四時而成歲漢儀高會膺萬國之貢珍中  
賀恭惟皇帝陛下德懋日新道侔乾始施恩動植仁已



決於嘉生比壽岡陵數莫窮於巧厯臣猥緣弱植獲侍  
天顏時乘端月之和彌格後天之祝

天申節賀表

伏以炎德中興祥發明離之旦虹光下燭欣逢出震之  
期凡屬含生率形善頌中賀恭惟皇帝陛下聰明憲古  
勤儉保邦德刑體冬夏之常信順獲天人之助義師雲  
集已清汝潁之風塵凱奏星馳行復闕河之氣象順迎  
嘉節茂擁純休拱衆星於北辰但虔封祝占老人於南

極益永堯齡臣一去天墀兩更歲籥奉璽書之一札方  
恪守於藩條上金鑑於千秋詎敢忘於家訓

伏以大火中天協寢明寢昌之運祥虹流渚啟載震載  
夙之期慶篤宗祧福均夷夏中賀恭惟皇帝陛下躬湯

勇智服禹儉勤念久履於屯蒙期力圖於豐泰省觀風  
俗燭幽遠於耳目之前總攬權綱運寰區於指掌之上  
茲天休之申命見王化之復行佇垂拱於巖廊永照臨  
於遠邇臣猥分帥閩邈在海隅拱北極以馳神莫遽駕

鴻之列指南山而獻壽敢殫犬馬之忠

賀冊皇后禮成表

臣某言伏覩進奏院報狀今月二日制書某人可立為  
皇后仍令有司脩禮冊命者楓宸敷號椒極正儀展盛  
禮於內朝溢歡聲於率土中賀竊以四星垂象仰占天  
極之明萬物流形咸賴坤成之育欲格人倫之正是先  
王化之基恭惟皇帝陛下修己以安人齊家而治國念  
贊烝嘗於九廟而從溫清於東朝中壺久虛輿情缺望

欽承太母之訓俯徇羣工之言金璽盤螭正隆名於寶冊  
褱衣重翟昭懿範於威容佇開夢日之祥以表覲天之  
異臣頃叨政路久竊仰於徽音今際休辰悵莫瞻於  
盛事望雲不及擊壤惟均

代皇子賀親蠶禮成表五道

德茂刑家播徽音於椒禁政先敦本藏盛事於桑壇中  
賀恭惟皇帝陛下仁以厚民治惟稽古乃至褱褕之重  
不忘織衽之勞臣猥以弱齡覲茲鉅典王化自近已大

竦於觀瞻民生在勤當不煩於勸課

治本儉勤禮載行於織室化享觀聽驩遂決於綿區中賀  
恭惟皇帝陛下德以身先治由近始帝藉既終於千畝  
公桑復始于三條臣託迹慈闈分封外壤鞠衣從事  
欣瞻三灑之儀紅女勸功行奉八綿之貢

治本農桑愛著躬行之實禮成宮壺聿觀神化之馳中  
賀恭惟皇帝陛下德茂勤邦仁深厚下載講蠶宮之事  
增嚴龍袞之華臣胙土藩方托身宸極三宮布繭已瞻

陰教之修五畝植桑更卜民財之裕

載開帝藉既終一墦之功從事公桑申講三條之禮中  
賀恭惟皇帝陛下若稽舊典敦勸庶邦粵季春之吉辰  
示長秋之懿德臣猥緣穉齒欣覲上儀繭館獻功行慶  
三宮之布絲人載績更深五綵之施

負宸端朝坐闡不言之教載鉤就室用彰敦本之仁中  
賀恭惟皇帝陛下恭儉愛人欽明若古曾是椒宮之懿  
不忘繭館之勤臣早被皇慈親逢盛禮織組紉庸是

勸於女功朱綠元黃竚克成於帝服

代皇子賀北郊禮成表五道

翠華就次極帝意之寅恭黃玉奠方仰靈心之嘉饗脩  
成懿典同切歡悰恭惟皇帝陛下膺命溥將凝謀丕顯  
天地明察達禮樂之中和中外辨嚴嚴威容之祲盛臣  
居慙弱植祇覲上儀雖微顯相之勤均賴榮懷之慶  
朱夏適中飭屬車而嚴辨方丘歲事欣盛禮之嘉成靈  
祇宴娛震海呼舞恭惟皇帝陛下宅中立極正厯握符

道兼於天幹萬邦而獨化祭重於地謹三歲之親祠臣  
屬忝天支親逢聖旦覲文明而竊抃慶福祚之增隆  
離明御治極聖孝以寧神坤載親祠接神娛而竣事靈  
祇歆祐海宇歡康恭惟皇帝陛下道配二儀化馳九有  
克禋克祀勤天步於六飛來燕來宜識颺游於八變臣  
猥慙弱植親遇聖時仰縟典之嘉成激懦衷而抃躍  
至日躬祠秩上儀而蒐舉方丘竣事仰協氣之流通神  
人協和內外交慶恭惟皇帝陛下道高太極孝格羣神



樂奏縱金已備函鐘之八變禮成奠玉想聞喬嶽之三  
呼臣謬托璿源獲觀縟禮莫預駕行之列第深螽躍之  
誠

萬物資生禮不忘於本始百神受職誠自浹於幽明嘉  
事休成湛恩汪濊恭惟皇帝陛下道侔坤載明並日升  
泰折親祠內盡志而外盡物靈祇昭答山出車而河出  
圖臣仰托燾臨莫陪顯相祇覲文明之化第深鼓舞之  
誠

代皇子北郊齋宮起居表五道

星火謹時秋紫壇之裡祀郊宮夙駕躬盛服之齋明恭  
惟皇帝陛下德茂蓋容誠通幽顯嘉粟以奉旨酒式嚴  
坤載之承精潔以昭馨香遐想靈旂之下臣叨依宸極  
暫遠寢門冒茲袞暑之期宜有純禧之祐

剛日載臨奉令芳之嘉薦柔祗祗事昭衷正於馨香恭  
惟皇帝陛下大道無私至誠不息躬行典禮輔相於天  
地之宜夙次郊丘齋戒以神明其德臣暫違問寢第極

馳心履茲炎酷之辰茲介興居之福

祇建郊丘本坤元之博厚夙臨齋幄極母事之寅恭恭  
惟皇帝陛下德合元疆化孚有截抑成貶定每親事於  
壇場齋心服形用肅將於圭幣臣禮愆夏清心極葵傾  
諒幽顯之協綏宜寢饗之恬適

夙陳法駕靡辭蒸漚之勤前即郊宮備極精禋之享恭  
惟皇帝陛下高明體道恭儉宅心講希闊之彌文增光  
丕祚罄齋明之盛服祇見方輿臣闕侍寢門馳心齋幄

茂想寢興之適允宜福嘏之綏

親祠泰折丕昭希闊之儀夙駕郊宮備極齋明之意恭  
惟皇帝陛下神心經緯道體靜淵懷博厚持載之功禮  
儀既備罄精潔惠和之意夙夜惟寅臣猥托宸闡暫違  
寢膳式履炎歊之候茂膺福祉之綏

代皇子賀明堂禮成表五道

孝隆嚴父涓吉旦於九秋禮洽寧神得歡心於四表中  
賀恭惟皇帝陛下儀刑舊典祓飾彌文既嚴布政之居

尤謹親祠之德臣居慙穉弱莫預駿奔天其右之既謹  
我將之祀神之至矣但歌天保之詩

九秋涓吉肅修嚴配之祠百執駿奔式慶熙成之典中  
賀恭惟皇帝陛下丕釐帝命躬奉天經講曠古之上儀  
享太平之備禮臣叨封列國託庇慈闈宗祀明堂慙莫  
陪於顯相受釐宣室但同極於歡呼

季秋協吉躬展事於合宮嘉禮告成坐受釐於宣室中  
賀恭惟皇帝陛下昭哉嗣服大矣孝熙極事帝之小心

盡嚴父之達孝臣居慙弱植欣際彌文奔走且遽初無顯相之効搏拊琴瑟但形率舞之容

陽館親祠竭誠心於嚴配彤庭胥慶欣盛禮之嘉成中賀恭惟皇帝陛下堯德允恭禹功致孝歲講合宮之享坐臻四表之歡臣猥以弱齡欣逢華旦告嘉栗而奉酒醴具獲神靈之歆駿奔走而執豆籩莫預臣工之列榮盛豐備卜吉日於九秋圭幣肅將合高靈於五室中賀恭惟皇帝陛下功追先烈道匹天休歲當萬物之成

禮嚴上帝之配臣叨膺胙土莫預執籩對越在天仰精  
禋之克饗並受其福繫慶賴之維均

賀明堂禮成表

清蹕時巡深軫四方之多事合宮大饗恪遵三歲之彝  
章誠既格而神娛慶遂行而民賴中賀臣聞禮或隆而  
或殺祀有報而有所屬敵騎之肆行致庸典之幾墜未  
暇備隆於百禮特殺其文雖曰大報於三神以祈為主  
爰舉紹興之近制實遵皇祐之成模天地合祛祖宗並

侑聖明之能述作盡說拘攣衷正以昭馨香自膺顧享  
恭惟皇帝陛下生知恭儉躬履艱危菲禹食以寧神土  
堯階而率下齋明盛服蒐講上儀五室九筵制就嚴於  
路寢三牲八簋誠自接於高靈臣忝帷幄之舊臣備藩  
垣之煩使再逢熙旦獨遠周行駿事受釐莫贊鬼神之  
間疏恩作解獲霑雷雨之施

代皇子明堂致齋起居表五道

合宮必祀載蒐講於上儀路寢先期致齋明之盛服恭



惟皇帝陛下孝惟嚴父明以事天欲通幽顯之情爰極  
精誠之享臣夙居宸禁暫去寢門道默感於三靈動宜  
膺於百順

合宮歲事禮欲竭於孝思路寢齋居享用昭於精意恭  
惟皇帝陛下率時昭考對越在天悽愴於霜露之時齋  
戒以神明其德臣暫違定省第極瞻依諒幽顯之協綏  
宜寢饗之怡適


展事明堂大備九秋之享飭躬秘殿載嚴三日之齋恭

惟皇帝陛下孝以奉先聖能饗帝告嘉粟以奉旨酒致精潔以昭馨香臣久獲趨庭暫違問寢想神明之調護宜福嘏之來綏

太室親祠本孝思之罔極路朝風次竭精意於先期恭惟皇帝陛下饗帝盡恭寧親為大將奉旨酒之嘉粟乃躬盛服之齋明臣仰竊燾臨暫違定省昭受上天之祐允膺多福之貽

饗帝明堂肅致精明之德儲神齋幄靡辭夙夜之勤恭

惟皇帝陛下禮備情文誠通幽顯欲奉令芳之嘉薦必  
昭忠信之馨香臣暫去慈顏但馳丹悃仰冀靈心之格  
茂膺福履之綏





欽定四庫全書

集部

毘陵集卷三至五

詳校官庶吉士臣翁樹培

侍讀臣孫球覆勘

謄錄副貢生臣杭光晉

謄錄監生臣任溥

欽定四庫全書

毘陵集卷三

宋 張守 撰

表

謝宣諭詔書表

臨遣星輶撫傷痍之遠俗俯頒帝綽形惻怛之溫言仰  
睿治之東漸騰驩聲而北拱中謝恭惟皇帝陛下躬禹  
勤儉性湯寬仁總攬權綱體德刑於冬夏巡行方嶽省  
耕斂於春秋顧黎元久困於干戈慮詔令徒施於墻壁

深求民瘼益固邦基尚憂聖澤之未宣分遣使華而申  
諭選求時望假之憲府以重其事權賜對便朝付以璽  
書而稽其課最欲大蘓於凋瘵期盡掃於煩苛武夫感  
涕以銜恩癯老扶携而觀化臣猥司屏翰謬布教條念  
久侍於清光亦粗知於德意坦然明白奉以周旋何止  
楚王拊三軍而挾纊敢師漢吏期千室之鳴絃

應詔論事詔書表

臣某言伏奉詔書以卻敵之初圖善後之計凡今攻戰

之利守備之宜措置之方綏懷之略可悉條具來上者  
殘孽宵奔慨念治安之策虛懷書訪寵頒深厚之詞命  
既重而難勝口欲陳而罔措中謝伏念臣學膠古始智  
昧幾先葵藿之心雖不忘於存闕芻蕘之論曾何補於  
籌帷屬寇亂之不平廓規模而遠覽豈伊衰謝亦預咨  
詢茲蓋伏遇皇帝陛下果斷而大有為指麾而無不服  
信順得天人之助安強本道德之威湯政克寬亦大昭  
於聖武禹功不伐仍下拜於昌言益思善後之圖以復



金史卷之三  
三  
無前之績渙絲綸之溫詔昇簪履之舊臣德意所存中  
興可必愚衷雖竭下策何施仰清問之不遺庶片言之  
或補終虞蹇淺莫贊都俞祇玩細書忝盛文之賜札慙  
非親語可稱善於終篇

謝南郊大禮加食邑表

臣某言準告以郊祀大禮赦恩加食邑三百戶尋具辭  
免奉詔書不允者歲禮對天曾豆籩之莫預疏恩加地  
尚簪履之弗遺未獲懇辭亟聞申命伏念臣壯心凋落

病骨支離理故國之丘園稍休暮景奉真祠之香火少  
報天恩會三歲之親祠蒐多儀之久廢禮樂明備神祇  
宴娛竣事園丘想靈旂之來下均釐寰宇仰睿澤之旁  
流欣際難逢之辰叨蒙多與之邑此蓋伏遇皇帝陛下受  
天全付躋世中興孝允格於幽明誠克參於高厚卜年  
卜世符三代有道之長饗帝饗親致四海以職來祭雖  
莫瞻於盛典亦竊冒於殊榮曠然三省之仁普霑赤子  
假以一成之地增責陳人未填溝壑之間終效涓埃之

報

謝加食邑表

臣某言準告食邑三百戶尋具辭免伏奉詔書不允已  
望闕謝恩祇受訖配天之澤光被綿區加地之榮猥霑  
衰質控辭靡獲登受惟慙中謝伏念臣學不造於淵源  
器僅容於圭撮虛名浮實寵祿逾涯叢然頽暮之餘惕  
若滿盈之懼際中興之盛旦慶絕古今廓丕冒之深仁  
榮均遠邇抱疾久尸於祠廩申恩復衍於爰田此蓋伏

遇皇帝陛下聰明以有臨神武而不殺兢兢業業外銷  
北顧之憂洩洩融融內盡東朝之樂茲蒙休於上帝遂  
加惠於微臣明試以功曾乏絲毫之補多與之邑尤慚  
綸綍之華誓虔香火之緣仰効岡陵之祝

謝明堂加食邑表

臣某言准告以明堂禮食邑三百戶尋具辭免今月二  
十三日准詔書不允已即時望闕謝恩祇受訖者緝禮  
熙成莫預執籩之列湛恩溥博叨蒙加地之榮懇避弗

諧欽承有醜中謝伏念臣凡材蹇淺病質龍鍾膺獎用之過隆懼滿盈之必覆周旋近服壤連三輔之優蒐講上儀目斷九筵之邃念祖宗之故事眷帷幄之舊臣或計陪祠預頒名節自敵騎長驅之後非禮文備舉之時雖未靖於艱虞猶不忘於慶賚此蓋伏遇皇帝陛下恩被動植孝通神明循息馬論道之規正嚴父配天之義靈旂來燕知多福之永膺霑澤旁流合庶民而敷錫肆衍爰田之賦增榮分閭之嚴漢石二千已冒孝宣之重

寄齊邑三百終憂伯氏之非宜尚勉效於糜捐期仰酬  
於優渥

謝中使傳宣撫問兼賜夏藥表

臣某言伏蒙聖恩差入內侍省東頭供奉官史彬傳  
宣撫問兼賜臣夏藥一銀合者輟九重之近密俯賁溫  
言軫三伏之炎歎寵頒珍劑恩非常擬感溢情涯中謝  
伏念臣一去闕庭再罹寒暑餘齡晚晚病骨支離未酬  
覆燾之私每迫陰陽之寇欲逃瘵敗歸乘下澤之車敢

謂記憐加賜上池之藥此蓋伏遇皇帝陛下坐恢遠畧  
力致中興在知人在安民不泄邇不忘遠察臣久陪帷  
幄粗忠樸以無它以臣遠守江湖假威靈而增重閱歲  
華之始半辱使驛之游臨敢不勉竭疲駑少圖補報俗  
期無犯田收賣劍之牛病或有瘳身效銜環之雀

謝中使傳宣撫問賜臘藥表

臣某言伏蒙聖恩差入內內侍省黃門幹辦祇候庫羅  
公彥傳宣撫問兼賜臣臘藥一銀合者叨分閭寄政未

報於期年申遣使輶來不遠於千里綸言假寵奩劑分  
珍枯朽生光湖山改觀中謝伏念臣初無術業誤辱獎  
知兩陪帷幄之嚴四領藩垣之重光陰易失悲急景於  
虞淵疾病相仍類竄身於漳滏屢辭劇寄尚閔俞音軫  
歲晏之嚴凝輟禁庭之近密細書一札具昭體貌之誠  
良藥萬金庶起膏肓之疾此蓋伏遇皇帝陛下日月容  
光之必照天地成物而不遺垂憐簪履之餘曲霑雨露  
之施顧天威在上不咫尺之違顏觀德化之成願須臾而



母死已銘心而戴德誓隕首以酬恩

謝宮觀表

引分授閒實緣衰病籲天有請仰沐慈憐名參祕殿之  
清職在真祠之佚拜恩優渥撫已兢慚中謝伏念臣稟  
性至愚謀身甚拙早從言責寢冒獎知初無借助之游  
談遍歷高華之妙選得時則駕豈虞富貴之危機直道  
而行竊慕聖賢之往躅奚經綸之小補積尸素之深憂  
况迫衰殘久妨賢路輒伸悃悞屢瀆宸旒敢謂天明不

違人欲許辭榮於政地俾就祿於祠庭雖三徑已荒無  
復鄉閭之舊業而一瓢可樂終為聖世之幸民此蓋伏  
遇皇帝陛下體徧物之堯仁懋勤邦之禹績兼收羣策  
宏濟多艱於小大之臣各極其器能而進退之禮曲全  
於體貌遂令孤藐終獲便安繫天蓋地容莫報君親之  
賜雖山深林密敢忘畎畝之忠

謝提舉臨安府洞霄宮任便居住表

臣某言昨知平江府以疾病奏乞宮觀五月十九日準

勅提舉臨安府洞霄宮任便居住即時望闕謝恩祇受  
交割府事與次官訖沉疴淹久屢控忱辭盛德包荒曲  
從私欲釋蕃宣之叢劇即隴畝之便安朝拜茂恩夕有  
生意中謝伏念臣夙稟<sub>三</sub>殘之質復乖衛養之宜李廣  
數竒第知安分馬卿多病每懼瘵官方聖主大有為之  
辰宜羣工思自盡於下亦圖策勵少答恩私事與願違  
氣隨志索況以郡處股肱之要其可冒居豈伊病在膏  
肓之間而能臥治獲伸危懼仰恃至明此蓋伏遇皇帝

陛下治格九功武昭七德責成近弼坐收破竹之功加  
惠舊臣深軫負薪之疾故雖衰謝不替初終獲依晚景  
於松楸庶遂首丘之願尚保餘生於蒲柳敢忘體國之  
心

謝除知紹興府到任表

臣某言伏奉告命除臣知紹興府充兩浙東路安撫使  
臣已於今月二十四日到任交割職事訖釋上流之重  
寄善狀無聞分近輔之名藩寵靈加渥扶衰就道觸熱

到官父老咨嗟豈意十年而復至教條習熟不煩三令而自孚既便且優以榮為悸中謝伏念臣兩叨政地四竊藩符皆逭曠瘼率由全度年齡晚晚道德有負於初心疾病沉綿神明未還於舊觀加以朞功之慘相仍於私室軍旅之事未靖於中原積憂所熏生理幾盡欲褰裳濡足則力有不逮欲處蔭休影而志有未諧固思漫效於糜捐終恐無裨於政化下陳蕃之榻已莫繼於前修懷買臣之章懼難圖於後效此蓋伏遇皇帝陛下紹

隆丕祚力致中興聖自日躋殆五帝其功不及順由天  
助符三代有道之長捷音累聞敵氣遄沮益務培於基  
本尤遴簡於藩宣察臣處心樸忠而無他可以布宣德  
意謂臣為政靜治而不擾粗能銷弭姦偷不忍遐遺特  
從內徙顧技能已試類既祭之土龍而齒髮更衰愧來  
迎之竹馬圖報儻伸於毫髮養病期返於邱園

謝宮祠表

臣某言昨知紹興府以衰疾再具奏乞宮祠準勅提舉

臨安府洞霄宮任便居住者痼疾益侵弗容強勉忱詞  
繼上遂沐矜從釋劇郡朱鹽之勞即真祠香火之奉感  
深增悸恩大莫酬中謝伏念臣蚤誤獎知備更華近五  
分郡紱兩玷輔藩屬抱病以連年歎衛生之無術以湯  
劑為飲食以方論為詩書身慮亡聊第覺餘生之可厭  
王事靡盬更懷失職之深憂瀝危惓以叩闕賜俞音而  
出綽既寬百謫復俾再生此蓋伏遇皇帝陛下明大燭  
幽仁深念舊指麾却敵坐申道德之威器使隨才內擴

中和之化處臣之禮每隆於體貌察臣之疾欲至於膏  
肓稍假便安曲全終始桑榆之景雖已遂於燕閒葵藿  
之心敢少忘於傾向

謝乞宮祠賜詔不允表

嬰疾病之支離籲天有請拜訓詞之溫厚踏地難勝恩  
未愁而技窮感既深而涕隕中謝伏念臣一違軒陛遽  
閱三秋數奉絲綸連收兩郡宣布中和之政撫循彫瘵  
之民期德意之遐孚豈勞心之敢憚久纏羸疾竄身已



類於清漳不任劇煩臥閣殆同於東海深虞瘵曠遂露  
忱誠非敢專圖安便之私實恐上誤使令之意未蒙賜  
可更假褒榮此蓋伏遇皇帝陛下德大包荒仁深念舊  
以嘗承乏於帷幄或可借重於藩垣故雖衰遲不忍捐  
棄報乏期年之政宜即謹訶賜先一札之書猥叨勞勩  
儻未先於溝壑誓仰答於乾坤

謝再乞宮祠賜詔不允表

晚境臥病忱詞屢瀆至仁藏疾溫詔嗣頒恩既渥而言

殫感益深而涕隕中謝伏念臣起自三吳之故里游更  
兩越之名藩意廣才踈心勞政拙顧七閩雖稍遠在諸  
路為最優姦盜翦除民方奠枕雨暘順適歲有積倉使  
臣自擇以居易地豈復加此况於哀謝豈不懷安但以  
稟氣素孱衛生仍拙節宣無術致六沴之陰乘湯劑罔  
功逮三醫之徧謁遂披情赤仰叩穆清庶幾少避劇煩  
暫休羸瘵亦匪專為便私之計誠恐自貽曠職之誅豈  
謂慈憐尚閔俞旨頒坦明之帝制申責孤蹤瞻咫尺之

天威敢違睿訓茲蓋伏遇皇帝陛下堯仁天大湯聖日  
躋久任以責成功兼容而收衆智故雖病瘁不忍棄捐  
再念臣視息僅保於餘生精爽未還於舊觀愧丙少卿之  
德寧復饗封非汲長孺之賢詎能臥治終虞瘝敗上玷  
使令誓殫體國之誠庶幾搨朽而摩鈍尚有首丘之志  
終期置散以投閒

謝乞宮祠賜詔不允表

臣某言近具奏乞在外宮觀一次今月五日伏準詔書

所請宜不允者冒貢忱詞期遂養疴之素志俯頒溫詔  
猥蒙藏疾之深仁假寵便蕃撫懷震惕中謝伏念臣名  
浮於實用過所長二府徧更守樸忠而自信三州詳試  
慙善狀以無聞福既過而延災氣早衰而被病茲睿哲  
大有為之旦正臣工思自盡之時固將效州縣之微勞  
庶或佐朝廷之大計心勞政拙欲陳力而不能外疆中  
乾歎衛生之無術與其坐俟曠療之責曷若亟披悃悞  
之愚暫解縻符庶少親於藥石未頒俞旨復申錫於絲

綸此蓋伏遇皇帝陛下廊上聖之英姿建中興之偉業  
雅重牧民之寄不忘记舊之心知臣粗歷藩宣當更責  
成於悠久謂臣雖嬰疾恙猶堪臥治於平時坦然深厚  
之詞賁此藐孤之跡疏恩至渥况瞻咫尺之威避事有  
嫌且懼再三之瀆欽承睿訓勉竭駑材儻後效之可圖  
豈餘生之足惜

謝乞宮祠詔不允表

臣某言近以衰病具奏乞在外宮觀先準詔書所請不

允尋兩具奏乞檢會前奏施行各準尚書省劄子奉聖  
旨依已降詔旨不允不得再有陳請者既衰且病屢控  
忱辭宜去而留實迫威命被恩感涕省已兢慙中謝伏  
念臣初知許國之小忠終乏濟時之遠略誤蒙勸獎受  
任超逾悲朽質之凋零重私門之灾釁茲備員於修水  
真卧治於清漳人棄干戈幸少休於卒歲日從湯劑幾  
不保於餘生誠恐終誤使令力陳悃悃紆十行之賜札  
曲形厚下之私拜三命於循牆猶負瀆尊之懼此蓋伏

遇皇帝陛下立國以德用人無私知遠民之難安共理  
為重戒郡符之數易久任是圖察臣有翦除姦盜之微  
勞憫臣嘗參預政機之累歲雖云抱疾未忍投閒敢不  
俯策駑材仰祇明訓黽勉從事姑稍效於捐軀疾痛呼  
天尚必期於從欲

謝除知福州到任表

召還經幄猥荷記憐就易藩封謬叨委寄布宣聖德慰  
諭遠民皆云遣政事之舊臣可以識朝廷之至意望雲

仰戴夾道歡呼始拜命以兢惶既入疆而感涕惟昔甌  
粵險遠之地為今東西全盛之邦八郡分支封圻袤廣  
三山鼎峙形勢尊雄向由劇盜之震驚尋苦戍兵之供  
億公私垂罄井邑就荒加以田疇亢旱之餘仍當海嶠  
防秋之日宜有撥煩之畧以為善後之圖伏念臣才厯  
試而不長命數竒而寡與政圖三載曾莫紀於勲勞輔  
郡兩時亦未聞於課最既逭譴訶之域遽陪清燕之間  
第迫病衰力祈退縮豈謂中宸之眷復分南顧之憂不



敢固避以貽擇事之譏尚期力行以勉報德之效此蓋  
伏遇皇帝陛下廓蓋容於天地躬勤儉於家邦明以見  
幾仁不遺察念臣久侍帷幄知勤恤之為先憐臣嘗備  
藩維粗安靜而不擾濬發獨斷申加茂恩再念臣本出  
寒知最為孤藐粗由直道不敢愛身顧惟閩中稍遠行  
闕俗既纖嗇以趨利士多請寄以為姦固當守法奉公  
以絕貪冒之私不敢違道干譽而懷畏避之計專求民  
瘼以固邦基諒無遠而不聞幸容光之必照挾知馬問

牛之術雖愧昔賢易帶牛佩犢之風願師循吏

謝走失編管人放罪表

徙鄉之惡宜謹防閑失職之愆自甘竄斥敢謂兼容之  
度曲推善貸之仁中謝伏念臣才不足以達庶事之經  
權智不足以察小人之情偽况乃病瘁困於劇煩顧姦  
慝逋逃雖有司之不戒而教條踈濶亦長吏之非才欲  
警官常宜從吏議方席藁以俟命遽出綽以疏恩不汝  
疵瑕猶天覆燾此蓋伏遇皇帝陛下宥過無大御衆以

金史四庫全書  
卷三  
寬謂建厦非止於一枝故張網必開其三面原情定罪  
既嚴主守之科觀過知仁曲全體貌之意敢不鞭其不  
及圖以自新仰思全度之施俯誓捐軀之報

代徐州太守謝上表

竊名謫籍已分棄捐假守要邦復叨甄叙省循汗下感  
激涕流中謝伏念臣智不足以周身才不足以出衆徒  
以遭逢熙旦冒昧睿知追上國之俊游綴甘泉之法從  
曾無小補自抵大訶積釁一身投閒七載仰明時而自

絕望天何異于戴盆悲涉世之多虞視地常同於跣足  
莫完玷缺倍費洗滌終賴乾坤之私復叨民社之寄矧  
是彭城督府禹貢舊封當汴泗二水交流之衝實楚漢  
羣雄角逐之地氣鍾慄悍俗喜寇攘必擇能臣以當重  
鎮豈伊衰晚可稱使令此蓋伏遇皇帝陛下道極蓋容  
仁均動植典禮復元豐之舊賞刑契神考之心念臣嘗  
侍冕旒可以推原德意察臣久安田里或能綏靖遠民  
乃于起廢之初付以承流之重臣敢不奉賜書之一札

體以愛民凡宣力于四方孰非報國並勤夙夜仰答生成

代人謝禮部侍郎表

出臨浦郡未聞報政於期年入貳春官復幸承顏於咫尺兼金增賁命服䟽榮拜寵數之有加揆庸虛而曷勝  
牢辭靡獲竊據惟慙中謝伏念臣門地不高天資極陋  
奮身寒遠遭世盛明偶緣一日之長遂際千齡之會拔  
從韋布驟越搢紳掖垣愧書命之才瑣闥冒論思之職

旋總成均之教繼叅宗伯之司恩積丘山效微毫髮巧  
承流於支郡勉試吏能逮尸祿以周星訖無善狀方俟  
黜幽之典敢圖錫命之申驟膺漢札之十行再覲堯眉  
之八彩復叨舊物益愧初心此蓋伏遇皇帝陛下大智  
旁明至仁兼濟運鈞陶之獨化埜圯無垠參覆載以成  
能區萌有狀致茲屏瑣亦預生成臣敢不退激懦衷欽  
承新命體淵冰臨履之戒祇慎百為報天地蓋容之私  
誓堅九殞

謝除禮部侍郎表

病衰自列念無補於艱危量廣兼容尚叨塵於嚴近循  
墻莫獲踏地難勝中謝伏念臣竊第於上皇臨御之初  
久服勞於州縣賜對於陛下中興之旦遂叨侍於旻旒  
洊充耳目之官圖竭股肱之力愚無一得窮有百罹精  
神疲於思慮之煩病瘁甚於驚憂之後力致籲天之懇  
仰丐投閒敢懷擇地之私但期逭責逮辭榮於專席乃  
承乏於貳卿將使論思則已試罔功復有曠瘵之懼止

充負品則于時多故豈無尸素之慙具瀝危衷繼申前  
請敢謂包荒之度特寬犯上之誅傳溫詔之褒揚曲煩  
近弼察寒蹤之孤藐留寘本朝仰厚德之不貲揆初心  
而有覲強顏就列力疾造庭此蓋伏遇皇帝陛下駕御  
英豪而大有為拔去凶邪而罔不服優容臺諫廓通遐  
邇之情眷禮臣鄰曲盡始終之遇顧惟蕞質亦玷鴻私  
念正人端士之言書紳自勵報厚地隆天之施刻骨為  
銘



代謝撫問表

承乏藩維未周歲籥疏恩宸扆游遣星輶寵靈載加榮  
悸交集伏念臣猥緣章句之學誤辱聖神之知雖中外  
之屢更蔑事功之可紀進貳九列已愧空餐假守四州  
訖無善狀方偷安於歲月期少逭於典刑敢謂慈憐申  
加撫諭使華俯暨德意具宣此蓋伏遇皇帝陛下量極  
包容仁均動植已格盈成之治不忘宵旰之憂念臣下  
之勤勞發訓詞之溫厚三軍挾纊千室鳴絃臣敢不益

竭智能仰宣條教王度已同於金玉惟在奉行聖言更炳于丹青未知稱塞

謝傳宣撫問表

臣某言今月十六日伏蒙聖恩差入內侍省東頭供奉官審思殿祇候黃克柔傳宣撫問者未能五月而報政方懷尸素之羞仰惟一視以同仁游沐撫存之渥使華泊館輿誦載塗豈惟寒陋之增華咸識聖明之念舊中謝伏念臣才疏鍾竄景迫哀殘繼叨剖竹之榮雖殫

志力數困負薪之疾蔑著事功已荷優容更垂簡記臨  
遣王人之重俯傳天語之溫此蓋伏遇皇帝陛下正五  
事以承天心推赤心而置人腹眷股肱之輔郡德澤宜  
先軫帷幄之近臣寵私未慙每曲形於慰藉以增重於  
觀瞻而臣體方中於沉疴神未還於舊觀固當自力思  
稱所蒙倦鳥知還終冀逃於曠責靈蛇銜報庶獲免於  
後圖

又

臣某言今月初二日伏蒙聖恩差入內侍省東頭供  
奉官主管史館諸司鄭毅傳宣撫問者澤國承流茂著  
蕃宣之效星輶傳命游頒深厚之詞仰聖眷之有加顧  
微蹤之豈稱中謝伏念臣猥以凡器早踐要津荷丹宸  
之誤知入陪二府叨朱轡之重寄出殿三州志大何為  
性疎寡與毫髮莫聞於補報筋骸屢困於沉綿周旋郡  
舍之幾時絡繹使車之及境溫言甚寵重拜知榮此蓋  
伏遇皇帝陛下道大兼容智明旁燭憐簪履之舊物曾

侍燕間錄屏翰之微勞益隆體貌哀遲自省榮懼交并  
雖撫字為勤未有及民之善政而寵光若此敢忘致主  
之初心當益勵於後圖誓無慙於晚節

謝中使傳宣撫問表

臣某言今月初二日伏蒙聖恩差入內侍省東頭供  
奉官林茂傳宣撫問者叨紆郡組未聞襦袴之謠就遣  
使輶俯賁絲綸之寵吏民改觀山水增輝中謝伏念臣  
夙被簡知久陪嚴近游臨帥閫錄屏翰之微勞還侍經

帷極儒生之榮遇而臣久苦陰陽之寇復冒風波之塗  
力丐就閒屢投誠於黼扆曲蒙從欲更假寵於藩垣慙  
德意之未宣辱溫言之遽及此蓋伏遇皇帝陛下天臨  
寰海子惠臣工愛民務極於撫綏念舊加隆於禮貌尤  
軫羈孤之跡特頒深厚之詞煖然似春載榮蒲柳之質  
就之如日但傾葵藿之心誓勉効於微勞庶仰酬於異  
眷

賀金人退遁表

皇威憚赫雷霆大震於要荒敵衆奔亡氛祲一清於淮  
海傳置郵而播告慶寰宇以騰歡中賀茲強敵之侵疆  
本逆臣之借勢天意悔旤人謀與能親御戎衣發至神  
之獨斷俯臨郊壘飛萬旅之先聲猛將星羅營屯衆整  
偏師電掃凱奏累聞螳莫拒于隆車魚尚游於沸鼎前  
窺天塹駭巨浸之春生側聽風聲曳疲兵而宵遁占彼  
烏鳥之樂由茲貔虎之威我方賈勇以鷹揚敵遂望風  
而星散江淮靜謐廟社奠安此蓋伏遇皇帝陛下建大

中以承天心有常德以立武事樹包荒之大度建撥亂  
之良圖戎騎肆行烽火雖連於三月鑾輿一動羽干自  
格於七旬固將恢復中原而迴六飛蕩平朔野而迎二  
聖繫天所相指日以須臣謬忝蕃宣獲觀露布屈人兵  
於不戰仰廟算之無遺數軍實以飲歸想天顏之有喜  
限以守藩在遠不獲稱慶闕庭

謝生日禮物表

門弧在旦方深顧復之恩宸綍自天叨被便蕃之錫家



庭榮耀里巷驚嗟中謝伏念臣謬忝政塗浣更歲籥雖  
免殫於淺拙曾無補於艱危慚懼空餐侵尋晚景劬勞  
罔極復悲載育之辰恩紀有加更竊大烹之禮此蓋伏  
遇皇帝陛下天臨海宇子惠臣工曲推體貌之誠俾盡  
股肱之力雖茲多故不廢彝儀佐家食以屬厭無復及  
親之養拜鴻私而勵翼永肩報主之身

代李憲賀檢法廳生芝草表

時三府  
獄空

至仁善貸叢棘屢空和氣發祥靈芝毓秀吐柯甚異按

牒鮮聞事越往初慶傳遐邇中賀竊以畫於衣冠而民  
不犯獨稱聖帝之時德至草木則芝自生式著前賢之  
訓眷東南之表廣稱吳越之浩穰俗習悍頑人輕抵冒  
故庶獄罕聞于哀息而比年數記于空虛曾是會稽亦  
無留訟本聖神之欽恤格天地之休嘉故茲璀璨之英  
發于詳讞之所盤根磊砢聳幹扶踈煥金彩以陸離零  
露華而沾滑究觀黃澤自符火德之昌式遘誕彌仍表  
椿齡之茂歷稽青簡之載故多朱草之珍銅池嘗記于

九莖山澗亦誇于三秀曾未有當園扉鞠草之後見華  
渚流虹之時實掩前聞亶為盛事茲蓋伏遇皇帝陛下  
道高太極澤被綿區徽功協于登三治具明于畫一好  
生之德蠲察察之繁文長發其祥顯煌煌之上瑞用集  
封巒之慶益光載籍之書臣愧無明敏之才獲際熙洽  
之運星占貫索共欣千載之逢歌奏芝房永播萬年之  
頌望雲雖遠擊壤惟均